

Zudë

-bha 'sëedhe 'ö- -kë

¹Mang Zudë -më 'a -kë yë -kë Yesu Klisi -dhe -më 'ka, 'ö 'a -kë Zakö 'zlaa- 'ka bha ma -në 'a 'sëedhe ya- bɔ mə 'pɛpɛ 'ö ka -dho -yö kwa Dë Atanna -kë, 'ö ka -dhe kö 'ka kë ö -bha mə 'ka, 'ö ka -maa kë sië Yesu Klisi -dhe bha ka -dhe.

²Kö- -bha mə -wëëga -sü bha waa- -bha zuëyagblüö-, waa- -bha -dho bha -ya 'bha -da 'gü ka -dhe -kpɛawo bha 'aa -yö kë!

³⁻⁴N "taɔngdë -nu, -yö gun n "piü 'nu -dhe 'a n 'gü dɔ "gbu- kö 'wɔn 'ö -gban kwa dha 'ö Yesu Klisi -ya wo bha- -bha bha 'a 'sëedhe bɔ ka -dhe yö -në- -wɔn 'gü. "Kɛɛ 'yö 'wɔn 'dhe 'ö -gban "gblüyaame -nu 'ö 'waa "suö Atanna -gɔ 'ö =wa -da kwa kpö 'gü bha- -nu -wɔn -bha bha 'ö dɔ n -gɔ 'ya- 'ö -ziö -a 'dhe 'kö bha- -ta. Kë "dhü kö 'a ka faan dɔ 'ko -zë 'më 'wo bha- -nu 'ka -sü -bha 'dhang -bho Yesu "dhiü -sü 'ö "dhü doseng 'ö 'yaa -plɛ, 'ö Atanna -ya nu 'më 'wo bɔ ö 'ka -a -nu -dhe bha- -wɔn 'gü. -A -gen -mü -dhe 'më 'wo bha -wo -da -sü 'ka kwa kpö 'gü 'ö 'kaa- 'wɔn dɔ. 'Më 'wo bha -gasite 'ö kwa Dë Atanna -ya -kë kwa -dhe bha- -wu bha -në wo -zë 'wo- sü 'yö 'wo- -kë 'wɔn "bhluubhlu kë- 'ka -wu 'ka, 'yö 'waa 'dhang bho kwa Dëmë Yesu Klisi 'ö "dhü doseng, 'ö kwa -gɔmɛ 'ka bha- "dhiü. "Kɛɛ -a 'wɔn- kwa 'yaan -dhe 'më 'wo "dhü bha 'wɔn 'ö Atanna yöö- wɔ- -nu -ta -yaa- -ben zë ö -wu 'sëedhe 'gü 'nu yi 'bha 'ka.

⁵A- 'wɔn -dɔ -dhe -kɔ 'ö kwa Dëmë -yö Izraëdhö -më -nu dha- 'ka yi 'bha 'ka Ezitö -sɛ 'gü, "kɛɛ 'yö -ya mü 'zü 'ö- gɔɔgbume -nu 'ö 'wii 'dhang bho- "dhiü -a -nu zë bha -yö ka 'yaan "pɛɛpedhö. "Kɛɛ ka -zɔ -në 'a- -bö sië -deewo. Kë "dhü kö ka -zɔ 'ya 'dho bho 'wɔn -nu bha- -nu 'ka. ⁶-Dhe Atanna -bha "kië -nu 'dhe 'ö -due 'ö- nu- -nu -dhe 'yii- -nu -zɔ 'kun 'ö 'wo -kwaa- -zü yi 'bha 'ka, 'ö 'wo wo bo wo -yɛa 'ka bha Atanna -ya -nu -ya -sü 'ka -dhetiidhe 'ö 'sɛ -wLöö bha- 'gü, -ya -nu -kplü -sü 'ka lɔɔ" 'ka mü, -wo -dho 'to lɔɔ" bha- 'gü "dhü 'ö zun- 'ka Atanna -bha za dɔ -yi -bha. ⁷Ka- 'wɔn -dɔ 'zü -dhe Sodömö waa- Gomɔɔ -dhe waa- 'pö- -nu 'wo gun -a -nu -züzü bha -wo kë- -kë 'pö -dhe -kɔ 'ö Atanna -bha "kië -nu bha 'wo- -kë 'ka bha-

'dhö, 'ö 'wo wo -gɔ "kpaɑ bho -zua zë -sü -dhe, 'yö 'wɔn "bhluubhlu suu 'ö me 'bha 'yii- suu kē do 'wo- -kē. "Kɛɛ -dhe 'ö =waa- kē 'dhü, Atanna kē 'wɔn bho- -nu 'gü 'ö peng 'ö 'yaa 'dhuu bha 'ö- -nu -bhö. Kē "dhü kö -yö kē me -kpeɑ -bha 'wɔn suan- -bho -bha -pē 'ka kö -wo "suü Atanna -gɔ.

⁸"Kɛɛ yö =nē- =gban 'gü, 'wɔnmakoomɛ -nu bha wo -zē -wo -toseɑ kē siē -kɔ do bha =nē- 'gü, 'yö 'wo -zɔ gɔn "yɛɛn -nu 'wo- bho bha- -dhe, 'yö 'wo =bhlēɛ bho wo -dɪ -bha -a 'ka, 'yö- -nu "yan 'dhö -ziö Atanna 'gü, 'yö 'wo "sɪ -nu =gban bho 'tɔ bhɔ -pē -nu 'wo dhang- 'gü- -nu -gɔ. ⁹"Kɛɛ 'sa Atanna -bha "kiē 'wo- Misɛdhö -kē, 'ö- -bha "kiē =gban -gɔmɛ 'ka bha, yöö -zian 'yii yö -zē suu kē. -A pö 'a- wo "dhü bha- 'klɔɔ- -mü -dhe Misɛdhö bha waa- Sɔtraan 'wo 'dhinaa 'ö- ma Moizö =gee -ta yi 'bha 'ka kö -wa -ta za do siē bha, 'yii =mɔɔ- -bha kö- -wɔ -yö ziö- "dhiü -zianwo Sɔtraan -dhe -dhe me -yö "si bho me -gɔ. "Kɛɛ -ya pö -dhe doseng =dhe: «Kwa Dème =nē dho -a bho i 'gü!» ¹⁰"Kɛɛ wo -zē 'wɔn -zian 'ö 'waa- 'gü ma bha -wa -dhiang -zē "dhidhe yaa 'ka. -Wo wo -gɔ =gban wo -zɔgɔngüwɔn -nu bha =nē- 'gü -dhe "bü wü -nu 'ö 'waa 'wɔn -ya 'klɔɔ- "dhiü bha- -nu 'dhö. "Kɛɛ 'sa yö =nē dho kē- -nu -gɔtobhawɔn 'ka. ¹¹-A -nu -bha -yö -wēɛsü. -A -gɛn -mü =dhe zian do 'ö Kaɛn -ya sü yi 'bha 'ka bha =nē 'wo- sü bha. =Wa wo -gɔ -gban =flü kē -sü 'gü, kē "dhü kö 'wo =naɔ =slɔɔ =dhe -kɔ 'ö Badhaamö -ya -kē 'ka yi 'bha 'ka -a 'dhö. -A -nu 'gü =ya see-, -a -gɛn -mü =dhe =wa -ya -kɔɔ 'gü Atanna -gɔ =dhe -kɔ 'ö Koodhe -ya -kē 'ka 'pö yi 'bha 'ka -a 'dhö.

¹²'Mɛ 'wo bha -wo =dhe ka -gɛn "dhiü -zuö -bha -gwē =nē- 'dhö, kɛng- -nu ka -bha -dhiē kē -sü 'ö dheebhang -dhe 'gü Atanna -gɔ 'kɔɔdhö bha- 'gü. -A -gɛn -mü -dhe -wa -bhö 'niyaadhe -bha "gblüüdhe "gbeadhe -bha, -a 'yiü- 'yaa- -nu kē, -wo =dhe dha 'ö -ziö "dhuu 'gü =nē 'dhö, -wo =dhe 'zü =dhe "dhü 'ö "tɛɛ =yaa- bho "sɛɛ 'ö =ya ga, 'ö 'yaa =mɔɔ- -bha kö -yö bhe -ya 'zü aa" =ni kö- "tüng -ya -loo =nē- 'dhö. ¹³-Wo =dhe 'zü =dhe "yi 'ö =ya dunng bho =nē- 'dhö, 'yö- -nu kēwɔn yaa -nu bha 'wo -wo "yɛɑ -dhe 'yi dunng -sü bha- "vuu 'ö -kē -ta bha- 'dhö. -Wo =dhe 'zü =dhe "susɛng -nu 'wo zian -kan -siē dhang- -bha -dhe -nu 'gü bha =nē- 'dhö. -Dhetiüdhe 'ö -dhe 'yaa yö- 'gü bha =nē Atanna -ya -ya 'me 'wo bha- -nu -gɔ -a -nu 'dho -dhe 'ka. -Wo -dho 'to -dhe bha =nē- 'gü 'ö to "dhü "sɛ 'tuü- 'ka.

¹⁴'Mɛ 'wo bha =nē Enökö 'ö -kē 'me 'wo do Adan "piü -a -nu "saɔplɛ -naa 'ka bha -yö dhiang zē- -nu -bu 'gü Atanna -wɔ "dhiü -loo -sü 'ka yi 'bha 'ka 'ö- pö: «-Ka -dhe -ga, kwa Dème -yö nu siē waa- 'ö -bha "kiē "slüüslü -nu bha- "gblü -kaɔng dunng 'gbe 'dhö, ¹⁵kö -yö za do me =gban "pepe -bha, kö 'me 'wo "yan -ziö 'gü -wɔn -nu -kē -a 'ka bha -ya -nu dheɛ" 'kpɔ, kö 'me 'wo -ya -gɔ -kaɔ 'gü 'ö 'wo gɔɔgbudhe -dhiang -nu zē- -dhe bha -ya -nu dheɛ" 'kpɔ 'pö. ¹⁶'Wɔnmakoomɛ -nu 'wo "dhü bha 'wɔn 'bha -wɔn 'bha 'yaa- -nu -zɔ 'kun, -wo -to -dɔn -bho wo yun 'gü -sü =nē- -bha "dhü -kpeawo, 'wɔn 'dhe 'ö- -nu -gɔ 'gü =nē 'wo- -kē, 'yö 'wo wo "dhiü -ziö -ta -dhiang -nu zē, =ya 'go mü 'yö 'wo -wɔ "nɛɛnɛɛ -nu pö me -nu -dhe, kē "dhü kö 'wo- -nu -ta -bhö.

17"Kεε ka -zë, n -sëmε -nu, ka -zv 'ya 'dho bhɔ 'pë 'ö kwa Dëmε Yesu Klisi -bha bɔmε -nu -wa pö ka -dhe yi 'bha 'ka bha- 'ka. 18-Wo kë- pö ka -dhe -dhe: «"Kpungtaadhe "dhiü 'to "tüng 'dhö -wo sië, "yu -to ka -bha -mε -nu -dho 'sɔ-, 'ö 'wo "yan -ziö 'gü dɔ Atanna -bha, 'ö- -nu -bha 'ö -dhi -nu -dhe -në 'wo- -kë.» 19'Mε 'wo "dhü bha =në 'wo nu 'gügblüdhe 'ka, Atanna -bha 'Nii- 'yaa- -nu 'gü. -A -nu -dhidhewɔn =në- -kɔ =ya ziö- -nu -gɔ. 20"Kεε ka -zë, n "taɔngdë -nu, ka -bha -zv -yö Atanna -dhe -sü "slüüslü 'ö pö 'aa- -bha bha, -kaa 'kun 'gbu-, -a -da 'gü -në -kaa -da kö 'ka 'dho- 'ka "dhiü, kö 'ka bhεa" Atanna -dhe -a -bha 'Nii- "slüüslü bha- -bha 'gügbudhe 'ka. 21Kö 'ka 'to -kplü -sü 'ka- -bha -dhɔ bha- -bha kö -yö 'to- 'ka "dhü -yö zun- 'ka yi 'ö kwa Dëmε Yesu Klisi dho kwa -wëë -ga 'ka 'ö kwa gba =sii 'ö 'yaa yën- 'ka bha- -bha.

22'Mε 'wo -tun dɔ -sü 'ka 'kën 'gü Yesu Klisi -wɔn 'gü bha -kaa -nu -wëë -ga 23kö 'ka- -nu -ta 'kun kö -wo dha peng -gɔ. Mε -kpea 'wo 'dhö -a -nu -wëë -yö ka kë, "kεε -yö ka kë "suü 'ka, -a -gen -mü =dhe bian -ya -nu -bha 'ö- -nu -bha -sɔ -nu =gban -bha. 'Ka- kë -së kö ka -kɔ 'ya 'dho -da -a 'bha 'gü.

24-25 Atanna 'ö "dhü 'ö doseng, 'ö kwa dha kwa Dëmε Yesu Klisi 'saa- 'gü bha =në- 'tɔ -yö bhɔ, -a -gen -mü =dhe yö =në 'kpü-, yö =në "su 'dhö- -dhe, -kɔ -mɔɔ 'wɔn -bha -sü -yö -gun -gɔ yi 'bha 'ka, 'ö -tun -gɔ =dεε, 'ö dho 'to- -gɔ -todhü 'ka. -A pö 'a- wo "dhü bha- 'klɔɔ- -mü =dhe yö =në- -kɔ dho =mɔɔ- -bha kö -yö ka -maa kë kö ka -gen "dhiü 'ya 'dho -zuö 'ö 'ka -pö -bha zian bha- -ta 'ö to- 'ka "dhü 'ö zun- 'ka yi 'ka dho -da 'ka -a -bha -gblüädhdhekëdhe 'gü, kö pö 'aa ka -bha, "kεε =niidadhe -ziisü ka bha- -bha. Kö- 'tɔ -yö bhɔ "dhü tean- 'ka bha 'aa -yö kë!